

نومرو : ۱۷

ایکینجی سنہ

علم حقوق

مقایسہ قوانین مجسمہ و عری

ہر آی نشر اولنور

مؤسس و صاحب

کرمیچہ مہرئی : محمد عارف

هتك عرض

Attentat à la pudeur

يانية مرکز بدايت محكمه سی اعضا سندن : ياقو سامی

قانون جزامزك باب ثانیسی اوچنجی فصلی عرضه ایدیلان تعرضات ایله مغایر عار و حیا حرکات علنیه حقننده ترتیب و تحدید ایدیلان مجازاتی میندر . هتك عرضی موجب افعال ایله مغایر عار و حیا حرکات علنیه اخلاقاً مذموم اولمقله برابر طوغریدن طوغریه هیئت اجتماعیه نك، آسایش و حضورینی اخلاص ایتدیکنندن آنجق عانی اولدینی احوالده مستوجب مجازات اولورلر . علنیت اولمازسه جرمیت دخی اولماز . قانون جزامزك ۲۰۲ نجی ماده سنده کی « علناً » قیدی « خفياً » اجرا ایدیلان بومثللو افعال مذمومه جرمیتدن اخراج ایچون وضع ایدلمش بر قید احترازیدر . بناءً علیه ناموس و عرضه ایدیلان تعرض مجازاتی استیجاب ایده ییلمك ایچون اول امرده بالمحاكمه علناً ایقاع ایدلمش اولدینی تحت قراره آلملیدر . ماده مبحوث عنیه کی علناً قیدی اطلاقندن منفهم اولورکه كرك ایقاع ایدلدیکی محل و كرك بونی ولی ایدن احوال سببیه عرضه ایدیلان تعرضاتك متحمل اولدینی علنیتك هر نوعه شمولی واردر . بناءً علیه ممر ناس ویا آجیق میدانلرده لیلاً ارتكاب ایدیلوب هتك عرضی موجب جرائم کیمسه طرفندن کورلماش ویا کیجه لین ایقاع ایدلمش ویا خصوصی و قبالی بر محله ایقاع ایدیلوب بعض کسان طرفندن مشاهده اولنش اولسی کیفیتینی علنیت رکنی سالب اوله ماز ،

قانون جزامزك ۲۰۲ نجی ماده سی حکمنجه جزالنیریلان بومثللو مغایر عار و حیا تعرضات بلا جبر ایقاع ایدلمش اولانلر اولوب تعلق ایدلدیکی اشخاصك عرضی هتك و اخلاق عمومیه حسنیه بی اخلاص ایله برابر بالتصادف تعرضات

مذکورہ میں حین ایقاعندہ مشاہدہ ایتش اولانلرک اخلاق عفیفہ لرینی جرح واخلالنی مؤدی اولدیغندن دوچار مجازات ایدیلورلر .

واضع قانون مادہ مذکورہ ذیلنک فقرہ اولاسی صراحت قطعیه سنجہ مغایرادب و حیا حرکات علنیہ میانندہ اقوالی دخی ادخال ایلدیکی مشهود مزددر . واقعا ذیل مذکورده کی حرف اندازلحق تعبیر قانونیسی مطلق اولمسی وهله اولاده بر نقیصه قانونیه عد اولنه ییلورسه ده مدنیتک ویا نزاکتک ویا مودانک تجویز ایلدیکی لابلالی وسر بستجه اطوار وحرکات واقوال وصورث تلبس ، اخلاق وناموس واداب عمومیه نك تعیین ایلدیکی حدی متجاوز سفاهتکارانه اطوارو وضایع وافادات عادیه وتلبسده امالدن قولایلقله تفریق ایدیلیرشیلردن اولدیغندن واضع قانون ذیل مذکورک فقره اولاسنده کی حرف اندازلحق ایله فقره ثانیه سنده کی « صارق دیلق » تعبیر قانونیلری هیچ برقید تفسیری خارجی ایله تفسیده لزوم کورمامشدر . جرم مبحرث عنه قانوناً تحصیل ایده بیلیمک ایچون هر حالده تعرض واقع بر فعل مادییه تعلق ایلمش اولمق لازم ایدوکی علمای حقوق بیاننده متفقدرلر . بویله اولمازسه جرم مذکور قانون جزانک ۲۱۴نجی ماده سنده مصور جرمدن تفریقی مستحیل اولور . قانون جزامنک مواد متعلقه سنی وبالخاصه ۲۰۲نجی ماده سی ذیلی طرز انشا وتنظیمی وسبک وربطی بیان اولنان مطالعہ میں تأیید ایدبور . جرم مذکور فعل مادییه تفریق ایتیبو محض اقوال وافاداتدن تحصیل ایده جکی قبول اولنورسه عرضه تعرض جرمی تشکل ایتیبو بلکه اخلاق عمومیه میں تعرضی موجب بر جرم اولورکه مواد مذکورہ جزائیه ده مترتب مجازاتدن وارسته در .

ممر ناسده بر فاحشه نك برارککه تقرب ایله اونی جاب ودعوت ایله مسی ۲۰۲نجی ماده سی ذیلی حکمنی مستلزم اولوب اولیه جنی جای سسؤالدر . M. Delapalme « ذیل مذکورک امر ایلدیکی مجازاتی مستلزم اوله جنی جهتنی التزام ایدیور . مستنداتی نظامات ضابطه ایله تواریخ مختلفه ده مجلس ملی به تقدیم ایدیلان ومنع توسیع فحشیان متضمن لوايح قانونیه نصوصیدر . هر تقدیر لوايح مذکورہ قانونیت کسب ایتدیکنندن انفا مصور فاحشه نك فعل حقنده

معمول به اولامازسه ده فعل مذکورک مستوجب مجازات افعال قبیحه دن بولمق اعتباریه ۲۰۲ نجی ماده سی ذیلی حکمنه ادخالنده عدم اصابت قانونیه متصور دکلر . « دیور .

M. Delapalme نك شو صورتله محاکمه سی عبارۀ صریحه قانونیه به عدم توافقیه برابر محکمه تمیزک اجتماعینه منافی دوشیور . عرضه تعرض انجق افعال و اشارات تعرضیه ایله اولور . بر ارککه تقرب فعلی حد ذائنده عرضه تعرض ماهیتی حائر بر فعل اولیوب دعوت کیفیتی ایسه انجق اخلاق عمومیه بی جارج افعال قیلندن اولدیغندن ذیل مذکورک وضع ایلمدیکی حکمی بونلر حقنده ترتیب و تطبیق ایدیله مز . Hélié و chauveau بو صورت اخیری قبول ایلمکه برابر ارککه تقرب و اونی دعوت ایله اکتفا ایتوب بوکا بر فعل مادی ترفیق مثلاً ارزو ایلمدیکی ارکی حکمکه تشبث ایلسه ذیل مذکورک حکمی تطبیق ایلمک لازم ایدوکنی بیان ایدیورلر .

فحشیانه تحریک و اغرا — کنجلی فحشیانه اعتیاداً تشویق کیفیتی نظر قانونده مغایر عار و جبا حرکات علیه دن عد ایدلمشدر . « هرکیم که ذکور و اناث کنج کیمسهری اضلال و اغفال ایدرک فحشیانه تحریک و اغرا و اسباب حصولی تسهیل ایلمکی اعتیاد ایدرک آداب عمومیه به منافی حرکته جسارت ایلسه بر ماهدن بر سنیه قدر حبس ایله مجازات اولتور ، دیو مصرح بولنان قانون جزامزک ۲۰۱ نجی ماده سی صراحتین منفهم اولدیغنه نظراً بو خصوصده علانیت شرط قلنمدینی کی فحشک حصول و تسهیلی ایجاب ایتدیره جک احوال و اسباب و وسائط تعداد ایدلمدیکنندن تقدیری وجدان حکامه حواله ایدلمشدر . ماده مبحوئه نك حکمی کرک کندی هوسات شهوانیه سی تسکین ضمننده و کرک پاره مقابلنده و یا دوستی و لطف سائقه سیله سائرلرک اوکی هوساتی اطماع ایچون کنج کیمسهری فحشه تشویق ایدن اشخاص حقنده تطبیق ایلمکده ایسه ده حکم مذکور انجق سائرلرک هوسات شهوانیه سی اطماع و تسکین ایچون کنجلی اضلال و اغفال ایدوب فحشیانه تشویق ایدنلر حقنده تطبیق ایلمک لازم ایدوکی فرانسه محکمه تمیزیک هیئت عمومیه سنندن صادر اولان قرار مقتضایندندر .

ماده مذکور هنگ بوصورتله تفسیری علی العموم جزائیون طرفندن قبول ایدلمکده در .

اساساً روما قانونیه فرانسه قدیم جزا قانونی احکامینجه کندی هوساتی اسکات ایچون واقع اولان اضلال ایله سائر لک بوکبی هوساتی اطماع ضمننده واقع اولان اغرا - پرو نکلک [*] - بری برندن آیری جرم عدایدیلرک کیفیت اولایه راجع جرم حد ذاتده موجب مجازات اولیوب انجق اونی ولی ایدوب مستقل جرم تشکیل ایدن اسبابدن طولایی جزالندیریلور . پرو نکلک ایسه هر ایکی قانون حکمینجه جزالندیرلمقله برابر فرانسه قانون جزا سنده ماده مذکوره وضع ایدلمکله [*] جرم مذکور قصد ایدلمش اولدینی قانون مذکور مجلس مایده حین تذکرنده قومیسین نامنه M. Monseignat طرفندن : « عرضه ایدیلان تعرضاتدن بحث ایلکله فحش ایچون بشایان و یا ذکور و اناتک سنلرندن کوزلککندن تجربه سزلککندن و یا فضاحت اخلاقندن بالاستفاده پارهیه مقابل بربرنجی تقریب ایلکلی مدار معیشت اتخاذا ایلوب تعمیم وتوسیع مفسدت ایدیلان اشخاصک حالی فصل مسکوت عنه کچیر بله بیایر ؟ بعضی قانونر اشخاص مرقومهیی نفرت عامیه دوجار ایلکم صورتله جزالندیرمقده ایسه ده مدار اشتغاللری رسوای عالم اولان بو مثالو افغالی ایدن بدمایله ره قارشو نفرت عامهنگ نه تأثیری اوله بیلور ؟ ایسته بوقانون بوکبی ماترین و مشوقین نخشی مجازات جسمانیه و نقدیهیه دوجار ایلکله . . . الخ ، در میان ایدلمشی اتفاً بسوط مطالبهیه تأیید ایلکله برابر متن ماده دهکی : « کنج کسه لری اضلال و اغفال ایدرک فخشبانه تحریک و اغرا و اسباب حصولی تسهیل ایلکلی اعتیاد ایدرک . . . الخ » عباراتی کندی هوساتی تسکین ضمننده واقع اغغالی اخراج ایلوب انجق پرو نکلکی توصیف ایلکده و ذاتاً بری برندن آیری و بسبتون مستقل و جرمیت اعتباریه غیر مساوی اولان و چونکه کندی هوسات شهوانیهیی سائقه سیله کنج لری اغفال جرمی ایله برکونا شهوت سوقی تحتنده اولیوب پارهیه طمعاً کنج لری کرداب فحشه اتان کسهنگ جرمی حقیقه عین حکم جزائی واضع قانون طرفندن وضع ایدیله چکی مستبعد بولمقده و شوقدر وارکه عکسینی قبول

ایلمک یعنی هوسات شو و انیه شخصیه بی تطمین ضمننده کی اغفالک تجریم و تجزیه سی حیات خصوصیه منفور برعلیت بخش ایلمک کی مضر نتایجی تولید ایلمکدن بشقه فائده بی تأمین ایلمیه جکی مطالعاتی منضم اولنجه ماده مذکور دن حکمی محکمه تمیزک هیئت عمومیه سندن صادر قرار دائره سنده تفسیرنده اضطرار و قناعت حاصل اولور . ماده مذکور دن حکم تفسیری بو مرکزده اولقله برابر اجتهادات محاکم برچوق دفعه حکم قرارلرنده نظر دقتدن دور طوتمقده اولدقلرینی مشاهده ایلمکده یز .

ماده مبحث فیهانک طرز تنظیمندن و حکمی مفادندن مستنبطدر که فحشیاته تحریک و اغرا کیفیتی کرک مقصود نتیجه قبیحه مادهیه اقتران ایتسون و کرک تشویق و اغرا اولنان کسه پاک و عنیف قالمش اولسون هر ایکی حالد مشوق حقتده حکم مذکور تماماً تطبیق اولنماید . ماده مذکور دن تعمیق مندرجاتندن اکلایلوور که جرم مذکور قانوناً تحصیل ایده بیلمک ایچون مطلقاً اعتیاد حاصل اولوق و اعتیاد کیفیتی ایسه خصوصاً تقدیر یه دن اولوب وجدان حکامه محولدر . بوماده نک مقابل اولان فرانسه جزا قانوننک ۳۳۴ نجی ماده سنده اعتیاد تعیری Habitude عیناً موجوددر . قانون مذکور ک مجلس ملیده حین تذکرنده تعبیر مذکور ک حذفی ایچون « و چونکه کنجلی اضلالات و اغفال ایدرک فحشیاته تشویق ایدن کسان فعل قبیح مذکور ک اجرا و ایقاعنده مداومت ایتزسه مجازات کور مامسی لازم کله جکی اکلاشدیرر و شو قدر که بو مثللو مشوقینک افعالی جمعیت بشریه جه اول قسر . هلیکدر که هیج بر وجهله جزاسز قالمسی تجویز ایدیه میه جکی . » زمیننده مطالعات درمیان ایدلمشسده تعبیر مذکور ابقا ایدیلرک قانوننک حین ترجمه سنده عیناً نقل ایدلمشدر .

ماده مذکور دن فرانسه جه متننده « یکر می برایشندن دون ذکور وانات کنجلی ... الخ » دینلمش اولوب لسانمه حین نقلنده منی تعیین ایدن بو جهت بر ایلوب « هر کیم که ذکور وانات کنج کسه لری ... الخ » صورتنده تحریر ایدیلرک اصلنده سنن مذکور ی تجاوز ایدن اشخاصی اضلالات و اغفال ایدوب فحشیانه تشویق ایدنلر جزاسز قالمسی مفهوم سقامت انشائی بزه حین

ترجمه ده هر فصل سه نظر دفته التمهید رقی عیناً نقل ایدلمشدر. ماده مذ کوره عبارة صریحه سنجه اضلال و اغفال ایدیلوب فحشه تشویق ایدیلاندر کنج قیدیه تقیید ایدیلوب مشوق هر نه سن و صنعتده اولورسه اولسون حکم ماده باقی قاله جنی و انجق اهلیت کامله جزائییه حائز اولمندی حالد حقهده قانون جزائک ۴۰ نجی ماده سی احکامی تطبیق ایدیه جکی طبیعیدر. جرم مذکور تحصیلده لزوم قانونی تحتنده بولنان اعتیادک صورت تحقیق اجتهادات محاکم ایله حل ایدلمشدر اعتیادک ثبوتی ایچون فعل مذکور عین شخص حقهده تکرری مطلوب اولمندی کی ازمئه مختلفهده اشخاص مختلفه حقهده اجراسی حالندهده حصول بولور.

ماده مذ کوره نک فقره اولاسنده محرراحوال موجب مجازات اوله بیلیمک ایچون اعتیادک حصولی شرط قیلندی کی فقره ثانیهده کی افماله تعلق ایلدکه مستلزم مجازات اولور. اعتیادک هر ایکی فقره ارجاع و تشمیلی قضیه سی محکمه تمیزدن صادر مقررات ایله مجروح بولنوب و Carnot [۴] طرفندن رد ایلدکه برابر Hélié و chauneau طرفندن التزام ایلدکه و: «ماده مذ کوره نک احتوا ایلدیکی ایکی فقره قانونیه بری برینه شدتله مربوط وعین جرمه متدائر اولوب فقره ثانیه انجق مجرملرک حال و صنعتی اعتباریه تشدید مجازاتی متضمندر» دیورکه اصابتی اشکاردر.

کنجلیری اضلال و اغفال ایدرهک فحشیاته تحریک و اغرا و اسباب حصولی تسهیل ایتک جرمیه مظهرین علیه اولان شخصک اغفال ایلدیکی کنجک - قیزک - اداره بلدیه و یا ضابطهده مقید بولنسی مقام مدافعهده درمیان و اتیان ایتسی جرمیتی ازاله ایلماز. چونکه کنجلیرک - قیزلرک - اداره بلدیهده و یا ضابطهده مقید بولنسی بر تدبیر صحی اولوب یوقسه بولنرک اغفالی و فحشه سوقی حالنده حکم جزائی قانونی ترتیب ایدیه جکی متضمن دکلدر.

ذاتاً فحش ایله مألوف کنجلیری اغفال ایدوب فحشه تشویق ایدن حقهده بو ماده نک حکمی تطبیق لازم ایدوکنه دائر پارس محکمه سندن بر قرار

وارددر. [۱۸۳۵]

Commentaires au le code pénal A . 2 . p 10 [1]

کندی اوینی بزوندکاره ایجبار ایدنلر حقننده بو مادهنك حكمی تطبیق ایدیلورمی؟ M. DelaPalme . نظرأ خصوص مذکور ایچون نظامات ضابطهده احکام مانعه جزائیه بولدیفندن ماده مذکورنك حكمی تطبیق ایدیلهماز .

مادهنك : « اسباب حصولی تسهیل ایتمکی اعتیاد ایدرك ... » عبارة مطلقة صریحه سی بو کیلره تشمیل ایدلك لازم ایدوکنی افهام ایدر . شو قدر وارکه موجرك مستأجرك فحشه تشویق ایلدیکی شخصك کنج اولدیغی بیلمسی و فعلی ده تکرار ایقاع ایتمش اولمسی شرطدر . حنفید ویا حنفیده سنی اغفال ایدوب فحشه تشویق ایدن شخص حقننده ماده مذکورنك فقره ثانیه سی حكمی تطبیق ایدلك لازم ایدوکی M. Delapalme طرفندن درمیان ایدیلورسه ده مواد جزائیهنك تفسیرنده متخذ اصوله تماماً مغایر دوشدیکندن نظریه مذکورنك ردی لازم کلیر .

صفاره رضالیه یعنی بلا جبر ایقاع ایدیلان هنك عرض جرائمی اصحابی حقننده ۷ صفر ۲۹۱ تاریخی تذکره عایه نك حکمنه نظرأ صفارك اولبابده کی رضالیهنك حكمی اولیوب جبر عدا اولمقی لازمه دن ایدوکندن ۲۹۸ نجی ماده سی حكمی جریان یعنی جبراً ایقاع ایدلمش کی حکم ایدلك اقتضا ایدر .

جبراً عرضه تعرض ایله جبراً فعل شنیع اجرایی

قانون جزامزك مأخذی اولان فرانسه جزا قانون قدیمده جبراً فعل شنیع اجرایی جرمی ایله جبراً عرضه تعرض جرمی بری برندن تفریق ایدلمه رك عین حکم جزائی به تابع طوتامش ایدی . حالبوکه جبراً فعل شنیع اجرایی جبراً عرضه تعرض جرمندن ماهیه ده فاضیح اولمق حسبیه مقابلنده کی جزا نسبه اغیر اولمسی استلزام ایده جکنی ملاحظه ایدن واضع قانون بو نقیصه قانونیه نی تعمیر ایدرك فرانسه لاحق جزا قانوننده بو ایکی جرائم حقننده احکام مستقله وضع ایلمشدر .

واضع قانونمزدخی بو جهاتی نظر دقته الهرق احکام جزائیه مزده دخی

جبراً فعل شذیع اجراسی حالنده ترتب ایده جك مجازاتی ۱۹۸ نجی ماده ده
تصریح و جبراً عرضه تعرض جرمی حقننده ۲۰۲ نجی ماده سنك ذیلنده
حكم مخصوص وضع ایلمشدر .

جبراً فعل شذیع جرمی قانوناً تحصیل ایده بیلمك ایچون جبردن باشقه
فعل شذیعه دوچار ایدیلان شخص حقننده فعل مذکور غیر مشروع اولمق
اقتضا ایدر. بناء علیه زوجیه سنه جبراً فعل شذیعه بولنان زوج حقننده - ولو
بینلری تقریق ابدان صورتیه تقریق ایدلمش بولنسون - جرم مذکور اسناد
ایدیله ماز . شو قدر وارکه نشانلیسنه - ولو اولنمندن بر کون اولولسون -
جبراً فعل شذیع ایدن نشانلی حقننده جرم مذکور جزاء اسناد ایدیله ماز [*]
ارکان اصلیه جرمدن اولان جبر هر حالده « جبر مادی » اوله جنی بی
اشتباهدر. علمای حقوق جبری Violence « جبر مادی » Violences Physiques
و « جبر معنوی » Violences morales دیو ایکی قسمه تقسیم ایلمکده درلر .
carnot

۳۳۱ نجی ماده نك [**] قصد ایدیلکی جبر ، عادی بر جبر معنوی بر
اغفال اولیبوب بلکه مقاومت واقعه بی سلب و نزاع ایده جك بر « قوت مادیه »
Force physique « دیو تفسیر ایلمکده در .

جبر مادی فعل شذیعه دوچار اولانلرك شخصلرینه تعلق ایلمك لازم
ایدوکی کی فعل شذیعه ختام اجراسنه قدر دوچار اولانك مقاومتیه قارشو
ایقاع ایدلمسی مقتضیدر . بناء علیه بر کیسه آرزو ایلیوب کندیسنه تسام
اولیان بر قاریه فعل شذیع اجرا ایتك قصدیه ساکن اولدینی خانه جبراً
دخول ایلیوب قاری خوفه مغلوباً نفسی تسام ایلمه جبراً فعل شذیع اجراسی
جرمی قانوناً تحصیل ایلماز .

جبراً فعل شذیعه دوچار اولان کسه نك فحش ایله مألوف ویا جبراً فعل
شذیع اجرا ایدن ایله مقدما مناسبات غیر مشروعده بولنش ویا اولاد طبیعیه

[*] ماده ۳۳۱ - ۳۳۲

[**] ۱۹۸ نجی ماده سنه معادلدر .

تولید ایتش بولنسی خصوصاری جرم واقعی ازاله ایدهمیوب انحق فاعل جرم حقنده تحدید ایدیه جک مجازاتی تعدیل، مدار اولور.

اویقویه طالمش برقارینک وزوجی هنوزیتاغی ترك ایلمسندن متحصل غفلتدن بالاستفاده قارینک یتاغنه صوقولوب فعل شنیع اجرا ایدن کیمسه حقنده جبراً فعل شنیع جرمی جزاء اسناد اولهمیه جغنه متدائر تشرین اول ۱۸۲۸ تاریخی برقرار وارسهده قرار مذکور علیهنه علمای حقوق ومفسرین قانون شدتله اعتراض ایلمکده درلر. بوقراره قارشو Hélé و chauv eau دیورلرکه: «بو باده غفلتدن استفاده جبر قدر فضیح اولدینی و فعل شنیه دوجار اولان حقنده كرك مقاومتنه مقابل ایدیلان جبرك و كركه غفلتدن استفاده کیفیتنك نتایجی عینی اولمق و شاید عکسی قبول ایدیه جک اولورسه حبله و دیسه ویا مواد تنویمه استعمالیه ویریلان اویقودن بالاستفاده اجرا ایدیلان فعل شنیع جبر تحتتده ایقاع ایدیه میه جکی قبول ایدمك اقتضا ایدرکه نه منطقه نهده اخلاقه نهده حقوق طبعیهیه موافقدر.»

علمای حقوق و شراح قانون نظرند «جبر» فعل شنیه دوجار اولانك مقاومندن ویا مقاومت متحملینی دفع و نزع ایدیه جک حبله و دیسه نك استعما لندن مولد بر حال قانونی در - بو نظریهیه استناداً مقاومت ابراز ایتیمان مجونه بر قیزك عرضه كچمك جبری متضمن اولهمیه جغنه دائر پارس محكمه سنده برقرار وارد. اغوستوس ۱۸۳۵ ۷۰ صفر ۲۹۱ تاریخی تذکره عدلیه سی بو کی مقررات غیر مصیبه اصدارینك امكاتی رفع ایتشد.

قانونمرك ۱۹۸ نجی ماده سی ذیل احکامی عام ومطلق اولمق حسبیه هیچ برقید واستثنائی متحمل اولمديغندن زوجك زوجه سنه غایه مشروعه نكاحه مغایر و منافی اولان جبری افعال شنیه سی حقنده قابل تطبیق اولمق مقتضای قانوندر. علمای حقوق و جزایشونك فکری بو مرکزده در. غایه مشروعه نكاحه موافق افعال زوج طرفندن ولو جبر ایله ایقاع ایدمك بولسون — جرحه حاصل اولمدينی احوالده — تجزیه اولنه ماز. فقط غایه مشروعه نكاحه مغایر افعال بویه دکلدر. چونكه زوجه زوجك نفوذ وحقوق

زوجیتک سو استعمالاته بلا حمایه تسلیم ایدلما مشدر . قانون زوج طرفدن
 زوجہ حقندہ ایدیلان معاملات ضریبه و سائر تعرضاتی تجزیه ایلماکده ایکن
 تعرضاتنک اک دنی و فضیختی جزاسز براقه جنی فصل تصور ایدیلایمیر ؟

زوجین اره سنده حال زوجیت شرع و قانون دائرہ سنده اقامه ایدلماکده
 نه عرضه تعرض نه ده جبراً فعل شنیع متصور دکدر ۱۹۸۰ نجی ماده سی و ذیلی
 احکامی بونلر حقندہ قابل تطبیق اوله ماز چونکه طبیعت بونی مقتضیدر .

جبراً عرضه تعرض جرمی ایله جبراً فعل شنیع جرمندن ماهیه ایری
 و مفار قدر . فاعللرک اول فعلی اجرا سندن قصدی ماهیت جریه میله لری تعیینه
 مدار اوله ماز . شویله که جبراً عرضه تعرض مطلقاً هوسات شهوانیه بی تطمین
 قصدینه مقارن اولیه جنی کبی نفرت و یا اخذ ثار و انتقام قصدینه مقرون اوله
 بیلیر . و تعرضه دوجار اولان کسه فعل تعرضی اجرا ایدن کسه ایله جنماً
 متحد اوله بیلیر .

فیکر انتقام و نفرت مستند — و برکونا حس شهوتدن عاری — اوله رقی
 بر قادینک دیکر بر قاری وجودینه ایقاع و ایراث ایده جکی تعرضات جبراً
 عرضه تعرض جرمی تشکیل ایده جکی تحت قراره النمشدر (پارس محکمه
 جنائیه سی ۱۸۳۰) .

••

جبراً فعل شنیع اجرایی جرمک اسباب مشدده سی

نفوس مادی و معنوی . آیلقلی خدمتکار .

مأمورین عادیه و مأمورین دینیہ .

جرمده اشتراک

بالاده تفصیل ایدیلان جرائم حقندہ قانون جزا مزده موضوع احکام عمو
 میه به نظر آ اسباب مشدده :

اولا — بونلره دوچار اولانلرک سنی وحالی ، ثانیاً بو جرائمی ارتکاب ایدنلرک حال و صنعتی ، ثالثاً ، اشخاص متعدده نك جرم مذکوره اشتراکی کبی احوال دن عبارت ایدوکی تظاهر ایدر .

اولا — قانون جزامزك ۱۹۱ نجی ماده سنك حکمی معدل ۷ صفر ۱۲۹۱ تاریخی تذکره عدلیه سی و ۲۰۲ نجی ماده سی احکامیجه ، فعل شنیعه دوچار اولانك اون اوچ یاشنی اکال ایتما سی ، حقنده ولو لحوق رضاسیله فعل شنیع اجرا ایدلمسه رضانك حکمی اوله میه جنی و بناء علیه فاعل حقنده جبراً فعل شنیع جرمی حقنده موضوع مجازات تحدید ایدلمك اقتضا ایده جکنه و فعل قبیح مذکوره دوچار اولان هنوز اده تزویج ایدلماش قیز حقنده وقوعبولورسه متجاسری کورک جزاسندن بشقه تضمین بکرایله معاتب طوتیله جنی دنیللمسینه نظراً فعل شنیع جرمه دوچار اولانك صغرسی ویا اده تزویج اولنماش اولمی حالری اسباب مشدده قانونیه دن اولمق اوزره قبول ایدلیکنی کوریورز .

فرانسه قانون جزاسنده جبراً فعل شنیعه دوچار اولانك سنی اون بشدن دون اولدینی حالده فاعل اکر جبراً فعل شنیع اجرا ایدرسه کورک جزاسنك حد متناهی واکر جبراً عرضنه تعرض ایدلیکی حالده حقنده موقفاً کورک جزاسنی حکم ایللمکده در .

ثانیاً — قانون جزامزك ۱۹۹ نجی ماده سنجه : جبراً فعل شنیع اجرایی بوکا دوچار اولانلرک اوزرلرینه حکملری جاری اولان مریملری و یاخود ولیلری و یاخود ایلقی خدمتکارلری طرفندن وقوعبولورسه بش سته دن اقل اولماساق اوزره کورک جزاسی حکم ایدلیکنه نظراً ولی ویا مربی ویا ایلمی خدمتکار بولمق حالری واضع قانون اسباب مشدده دن عد ایدلیکنی واضحاً تعیین ایدیور .

فرانسه قانون جزاسنك ماده متقابله سنده و قانون جزامزك مار الذکر ماده سنده تصریح و تعداد ایدیلان اشخاص میانده برده مأمورین دینییه یی ادخال ایتیمکده در .

ماده مذکور مزایا شدن مستباند که ولی [°] ویا مربی [°°] ویا ایلملی خدمتکار [°°] ویا مأمورین عادی [°] ویا مأمورین دینیه [°°] طرفندن ایقاع ایدیلان جبری عرضه تعرض جرملی حقنده موقت کورک و جبری فعل شنیع جرمی حقنده مؤبد کورک جزاسی وضع و تحید ایلمشدر .

زوجک زوجه سنک زوج اخردن مالک اولدینی قیزه واقع تعرض حکمی جاری اولان شیخ حقنده وقوع بولمش کی ۱۹۹ نجی ماده سی حکمنجه جزا دیده اولسی لازمدر .

زده اهلیت کامله حقوقیه مجله جلیله حکمنجه بلوغ ایه حاصل اولدیغندن حد بلوغه واران قیزلر پدرلرینک تحت ولایتلرنده بولمقدن فارغ اولمقله برابر بولر حقنده پدرلری طرفندن ایقاع ایدیلان جبری عرضه کچیرمک جرملی قانون جزامزک ۱۹۹ نجی ماده سنک حکمنه توفیقاً تحید مجازات ایدمک لازمدر .

ایلملی خدمتکار او صاحبیه برلنکده اقامت ایتکده بولسان زوجه سی واولادی حقندهده بو صفتی حائز اوله میه جقلرندن بولر حقنده ارتکاب ایده جکلری جبری فعل شنیع جرملی حقنده ۱۹۹ نجی ماده سی حکمی تطبیق ایدیله جکی وارسته قید و بیاندر ،

M, Delaqualme . نظر آمتن ماده ده کی مربی کرک مکان مخصوصنده و کرکسه خصوصی خانلره چاغیریلوب کنجلرک تربیه سنه باقان کسه لدر .

ایضاح وتفصیلی صدندن بولندیغمز ماده قانونیه دهده « مأمورین » قیدی لزوم وضعی اثبات ضمننده شراح قانون « نفوذ و مأموریتی حائز ذواتک اخلاق و اطواری اشخاص سائر به مدار امتثال اولمق لازم کله جکی و بناء علیه بولرک بو کی جرائمی » ارتکابلرنده سائر نسبه شیدیاً دوچار مجازات ایدملری مقتضی ایدوکنی» بیان ایدیورلر Be lie .

شونی علاوهیه اضطرار حاصل اولورکه فرانسه قانون جزاسنک ۳۳۳ نجی

senitus agage [2] Mstititieu [2] oscndant [1] Mnistres de cultée
[2] fnctionnaines

ماده سنك مأمورین حقنده وضع ایدلیکی حکم انجق مأمورینك نفوذ مأموریتنی استعمال ایدرك جبراً عرضه تعرض ویا جبراً فعل شنیع جرائمی ارتکاب ایدلکاری احوال حقنده منحصر اولوب بوقسه مجرم ایقاعنده صفت مأموریتی اسباب مشدده اتخاذ ایدلسی احکام عمومیة قانونیه یه منافی دوشیور .

قانون جزامزك ۱۹۰ نجی ماده سننده مأمورین قیسدی کورلمدیکندن مأمورینك نفوذ مأموریتنی استعمال ایدرك ولو دائره مأموریت و صلاحیتلری خارجنده اولسون - ارتکاب ایده جکاری جبری فعل شنیع جرملری حقنده ماده مذ کوره نك حکمی تطبیق ایدیه مبه جکی طبیعی ایسه ده جرم واقع حقنده قانونزك ۱۹۸ نجی ماده سی حکمی تطبیق ایدلك لازمدر .

اشتراك

Complicite

فرانسه جزا قانوننك بو بابدکی موادك تدقیقندن : « مرتکب جرم کیم اولورسه اولسون اگر بر ویا بر قاج شخص طرفندن معاونت ماده کورمش ایسه ۳۳۱ نجی ماده سننده تصویر ایدیلان حالده موقت و ۳۳۲ نجی ماده سننده کی حالده مؤبد کورك جزالیه تحدید ایدلکی نمایان اولور ماده مذ کورده نك صراحتندن منفهم درکه مرتکب جرم معاونت ماده کورمیه نك انجق نصیحت ویا کندیسنه جرمك وسائط و صورت اجرائیه سی ارانه ایدلمش ایسه حقنده مجازات مذ کوره تطبیقه محل اوله ماز .

مشاهیر جزائیوندن carnot واضع قانونك بو بابد احکام شدید وضع ایلیمسی روح حکمت قانونه موافقتی اثبات ضمیمه دیورکه : « سائرلرك دخل و معاونتیه بو مثللو جرائمك ارتکاب و اتمامی ده ها سهیل اوله جفته و تعرض مذ کور شخص مغدوری نسبتاً عظیم بر تهلاکیه القا ایله برابر

« تعرض واقعه قارشو مؤثر بر مقاومت ابرازندن عاجز براقه جفته و متعرضك جنایت واقعه نی ایقاع و ارتکابی ایچون نیت قطعیة جرمیه سنی و فضاحت اخلاقیه سنی اظهار ایده جکنه بناء واضح قانونك بو بایده حکم شدید وضعنده اصابتی واردر . »

قانون جزامزك اولبابده کی فصائنده بوکا دائر بر صراحتہ مصادف اوله میورز . انجق ۲۰۶ نجی ماده سی فقره ثالته سی قاجیریلان قیز حقنده فعل شنیع اجرا اولنش ایسه بونی مرتکب اولانلر حقلرنده او فعل ایچون معین اولان جزانك منتهای درجه سی اجرا اولنور « دینلدیکنه تظراً تشدید جزا انجق فعل شنیع جرمی قیز قاجیرلمق فضاحتیه ترفق ایلدیکی احواله حصر ایلدیکی تظاهر ایدر . »

